

金鏡內臺方議卷之三

建安許宏集

古吳程永培校

大青龍湯 二十六

治太陽中風脉浮緊發熱惡寒身疼痛不汗出而煩躁者此方主之

麻黃

二兩

桂枝

二兩

甘草

二兩

杏仁

四十枚

石膏

鷄子大

生薑

三兩

大棗

十二枚

右七味以水九升先煮麻黃減二升去上沫
內諸藥再取三升去渣溫服取微汗如一服
汗出停後服汗出多者溫粉撲之

湯議

議曰余昔讀大青龍湯方以症參之嘗涉疑焉既
是太陽中風見傷寒脈浮緊是也又何發熱惡寒
身疼痛不汗出若此證參之皆是傷寒而加煩躁
又何得有中風之證在焉故諸家皆無明載只言

傷寒見風脉傷風見寒脉以此正經論之終是涉
疑一日請于先師伯榮黃公曰乃此一症中全在
不汗出三字上藏機且此不字是微有汗而不能
得出因生煩躁也無汗者乃全無汗也以此不字
方是中風此乃古人智深識妙之處今此中風症
復見脉浮緊乃中風症見寒脉也若與桂枝湯則
能治風而不能去寒若與麻黃湯則能治寒而不
能去風以此用桂枝麻黃各半湯中加石膏而治

煩躁名之曰大青龍者以其能發越風寒而散邪
氣者也故用麻黃爲君而散浮緊之脉桂枝爲臣
而治不汗之風杏仁甘草生薑大棗合而爲使石
膏爲佐而解風寒之併于經而加煩躁者也

大青龍湯戒

經曰若脉微弱汗出惡風者不可服服之則厥逆
筋惕肉瞤此爲逆也

議湯中有芍藥

議曰桂枝湯治中風麻黃湯治傷寒大青龍治中風傷寒二症合病者也既治二症湯中當用芍藥乃卽桂枝麻黃各半湯中加石膏而用薑棗爲引也只可治傷寒又安能治中風症也且芍藥一味其體雖小其用至大既有中風之症若無芍藥以和其營則用桂枝麻黃專治其衛汗出則成厥逆亡陽筋惕肉瞤者可立待也於乎千載之間世遠莫辨自先代宗師如朱奉議楊仁齋許叔微之儔

非曰不知乃知之而不肯明言也自後世之隔留
此數行以爲心口相傳之秘由是其書不得大行
于世予早承師訓書此以爲賢達者鑒

疑問

問曰何爲中風見寒

答曰中風症反見傷寒脉也如有自汗惡風乃中
風証脉當浮緩今反見脉浮緊者乃傷寒脉也故
曰中風見寒屬大青龍湯

問曰何爲傷寒見風

答曰傷寒症反見中風脉也如無汗惡風乃傷寒症脉當浮緊今反見脉浮緩者乃中風脉也故曰傷寒見風屬大青龍湯

問曰二症皆見若不煩躁者此可用乎

答曰旣無煩躁可除石膏勿用也

温粉者只用白朮藁本川芎白芷各一兩米粉三兩爲細末撲其身則汗止

小青龍湯 二十七

治傷寒表不解心下有水氣乾嘔發熱而渴或咳或利或噎或小便不利少腹滿或喘此方主之

麻黃 芍藥 乾薑 甘草 桂枝

細辛 各三兩 五味 半夏 各半升

右八味以水一斗先煮麻黃減二升去上沫內諸藥再取三升去渣溫服

加減法

若微利者去麻黃加蕤花如鷄子大熬令赤色下
利者不可攻表汗出必脹滿故去麻黃加蕤花能
去十二經水水去則利自止故加之

若渴者去半夏加栝蒌根三兩以其半夏性燥故
去之栝蒌根味苦能生津故加之

若噎者去麻黃加附子一枚水得寒氣冷必相搏
其人必噎故加炮附子以溫之

若小便不利小腹滿去麻黃加茯苓四兩以其能利水道也

若喘者加杏仁半升去皮尖以其能潤肺而散水氣其脉浮者不去麻黃但脉沉者宜去麻黃也

湯議

議曰傷寒表不解則發熱心下有水氣則乾嘔而咳此乃水氣與溫邪相搏而成此症也或渴或利或噎或小便不利小腹滿或喘者皆有水氣內攻

也故與此方主之以麻黃爲君桂枝爲臣芍藥行
榮而散表邪以乾薑細辛半夏之辛爲使而行水
氣止嘔咳以五味子之酸而斂肺之逆氣以甘草
之甘而和諸藥爲佐經曰以辛散之以甘緩之以
酸收之者此也謂之曰小青龍者以其能發越風
寒分利水氣越超乎天地之間也

葛根湯 二十八

治太陽病項背強几几無汗惡風者

又治太陽與陽明合病者必自下利此方主之

葛根

四兩

桂枝

芍藥

甘草

各二兩

麻黃

生薑

各三兩

大棗

十二枚

右七味以水一斗先煮麻黃葛根減二升去

沫內諸藥再煎取三升溫服取微汗

湯議

議曰太陽病項背強几几無汗惡風者此中風表實也屬葛根湯若太陽病項背強几几反汗出惡

風者爲中風表虛也屬桂枝加葛根湯王之已載
于前詳矣又太陽病不解併于陽明者必下利亦
必此方內外均解之葛根性平能祛風行于陽明
之經用之爲君麻黃爲臣輔之發汗解表桂枝芍
藥爲佐通行于榮衛之間甘草大棗之甘生薑之
辛以通脾胃之津爲使此方乃治其表實而兼治
其合病併病者也

疑問

問曰表實無汗者麻黃湯均主之矣今又有此葛根湯發汗何也

答曰麻黃湯治寒邪表實惡寒無汗者今此項背強几几然惡風者乃有風在表而不得散只因無汗爲兼有寒邪故與桂枝湯中加葛根麻黃主之問曰經云下利不可發汗發汗則脹滿今此下利又發汗者何也

答曰少陰病下利清穀者爲裏虛若更發汗則脾

虛而脹今此太陽症未罷或有頭痛惡風寒等症
尙在表其脉尙帶浮便傳入陽明有口渴身熱等
症者必自下利也必須此方微發汗而散表邪中
有葛根以除陽明之邪也若是諸症發熱兼有裏
而脉浮者此方用之最善

葛根半夏湯 二十九

治太陽與陽明合病不下利但嘔者此方主之
本方中加半夏半升

右如法

湯議

議曰邪氣外盛裏氣不和氣下而不上者卽爲下利而不嘔裏氣上逆而不下者但嘔而不下利故與葛根湯以散其邪加半夏以下逆氣也半夏味辛能逐水飲止逆氣故用之也

葛根黃連黃芩湯 三十

治太陽症桂枝病醫反下之利遂不止脉促者

表未解也喘而汗出者此方主之

葛根

四兩

黃連

二兩

黃芩

二兩

甘草

一兩

右四味以水八升先煮葛根減二升內諸藥
煮取三升分溫服

湯議

議曰太陽病桂枝症宜發肌表之汗醫反下之內
虛協熱遂利不止脉促者爲表邪未解不當下而
下之所致也喘而汗出者卽裏熱氣逆所致故用

葛根為君以通陽明之津而散表邪以黃連為臣
黃芩為佐以通裏氣之熱降火清金而下逆氣甘
草為使以緩其中而和調諸藥者也且此方亦能
治陽明大熱下利者又能治嗜酒之人熱喘者取
用不窮也

白虎湯 三十一

治發汗後大熱不解多汗出不惡寒大渴能飲
水者此方主之

熱結在裏表裏俱熱者白虎湯主之又云其表不解不可與白虎湯此云脈浮滑表有熱裏有寒者必表裏字差矣又陽明一證云

脉浮遲表熱
 真寒四逆湯
 主之及少陰
 一證云裏寒
 外熱通脈以
 送湯主之四
 此表裏自差
 明矣千金翼
 云白通湯非
 也

知母六兩石膏一斤甘草二兩粳米六合

右四味以水一斗先煮米再加餘藥取五升

溫服

湯議

議曰汗出不惡寒反惡熱若脉沉實大便秘者爲
 陽明熱甚屬大承氣湯下之今此脉洪大煩渴能
 飲水者爲肺熱甚也屬白虎涼之經曰熱淫所勝
 佐以甘苦以知母之苦爲君大治肺熱以石膏之

心導樓
 卷之三
 一

寒佐之爲臣甘能散熱甘草粳米之甘爲佐爲使以救其熱之氣而緩其中者也且此四味之劑論之爲白虎者以其爲金神秋令肅殺之意大治傷寒大熱汗出煩渴飲水者爲神禁之方也

白虎湯戒

戒曰白虎湯乃大寒之劑若非大熱多汗渴飲水者不可服也若表証不解無汗而渴者又不可服也只屬猪苓湯經曰傷寒脉浮發熱無汗其表不

解者不可與白虎湯又古賦曰無汗喜渴而脉單
浮者勿投白虎

疑問

問曰活人書云白虎湯惟夏至後可用何耶

答曰非也古人一方對一証若巖冬之時果有白
虎湯証安得不用石膏盛夏之時果有真武湯証
安得不用附子若老人可下豈得不用硝黃壯人
可溫豈得不用薑附此乃合用者必需之若是不

合用者強而用之不問四時皆能爲害也

白虎湯証

傷寒脉浮滑者必表有熱裏有寒白虎湯主之

傷寒脉浮而厥者裏有熱也白虎湯主之

三陽合病腹滿身重難以轉側口不仁而面垢遺

尿譫語發汗則譫語下之則額上生汗手足逆冷

若自汗出者白虎湯主之

議曰仲景所謂白虎湯三症然有大小不同處亦

皆古人載之經典復書于此詳味之若果用白虎湯無差悞必須多汗飲水也

白虎加人參湯 三十二

治發汗後熱不退大煩渴飲水者此方主之

本方內加人參 三兩

右如法

湯議

議曰白虎湯症前亦議之加人參者取其生津止

內經大論卷之三
三
渴之義也

白虎加人參湯症

服桂枝湯大汗出大煩渴不解脉洪大者白虎加人參湯主之

傷寒無大熱口燥渴心煩背微惡寒者白虎加人參湯主之

傷寒脉浮發熱無汗其表未解不可與白虎湯若渴欲飲水無表証者白虎加人參湯主之

渴欲飲水口乾舌燥者白虎加人參湯主之
傷寒若吐若下後七八日不解熱結在裏表裏俱
熱時時惡寒舌上乾燥而渴欲飲水數升者白虎
加人參湯主之

疑問

問曰活人書云白虎湯乃汗後一解表藥何也

答曰發汗後熱當已若不已者爲實也更加有汗
熱不減爲表熱口燥煩渴飲水爲裏熱若表裏皆

熱者必用此方主之其五苓散亦汗後一解表藥也

金鏡內臺方議卷之三

金鏡內臺方議卷之四

建安許宏集

古吳程永培校

小柴胡湯 三十三

治少陽經發熱口苦耳聾其脉弦者又治太陽陽明二經發熱不退寒熱往來

柴胡

八兩

半夏

半斤

黃芩

人參

甘草

生薑

各三兩

大棗

十二枚

內臺方議卷之四
心導樓

右七味以水一斗二升煮取六升去滓再煎
取三升溫服一升日三服

加減法

若胃中煩而不嘔去半夏人參加括蕒實一枚

胃中煩而不嘔者熱聚而氣不逆也甘者令人之中滿方熱聚無用人參之補辛散逆氣既不能嘔無用半夏之辛治熱宜寒破聚宜苦故用括蕒實苦寒之劑以泄胃中蘊結之熱氣也

若渴者去半夏加人參一兩半括蕒實四兩

半夏性燥能損津液渴者故去之括蕒根性寒能生津止渴除熱人參能潤養津液故加此二者用之

若腹中痛者去黃芩加白芍藥三兩

少陽腹痛者為中有寒故去黃芩之寒加白芍藥止痛而益其中也

若協下痞鞭去大棗加牡蠣四兩

甘能令人中滿痞者故去大棗之甘鹹能更物痞鞭者故加牡蠣之鹽也

若心悸小便不利者去黃芩加茯苓四兩

心下悸小便不利者為水蓄不行故去黃芩之寒淡味滲泄為陽茯苓甘淡以泄停水也

若不渴外有微惡寒而熱者去人參加桂三兩

服取微汗則愈

不渴者無裏症外有微惡寒而熱者表未解也故去人參之補加桂以取微汗而散未盡

之表邪也

若欬者去人參大棗生薑加五味子三兩乾薑二兩

欬者為氣逆也甘能壅氣故去人參大棗之甘加五味子之酸以收逆氣肺寒則欬散以辛熱故加乾薑之熱而易生薑右以上加減法係正經中加減外有師傳加減者如發熱下利者加五苓散如嘔惡者加橘紅如胃中痞結者加枳實如欬逆而發熱者加丁香柿

下利者加五苓散如嘔惡者加橘紅如胃中痞結者加枳實如欬逆而發熱者加丁香柿

蒂如嘔吐
者加竹茹

湯議

議曰病在表者宜汗病在裏者宜下病在半表半裏之間者宜和解此小柴胡湯乃和解表裏之劑也柴胡味苦性寒能入膽經能退表裏之熱祛三陽不退之邪熱用之爲君黃芩味苦性寒能泄火氣退三陽之熱清心降火用之爲臣人參甘草大棗三者性平能和緩其中輔正除邪甘以緩之也

內臺方論 卷之四
三
半夏生薑之辛能利能汗通行表裏之中辛以散之也故用之爲佐爲使各有所能且此七味之功能至爲感應能解表裏之邪能退陽經之熱上通天庭下徹地戶此非智謀之士其孰能變化而通機乎

小柴胡湯証

傷寒中風五六日往來寒熱胸脇苦滿默默不飲食心煩喜嘔或胸中煩而不嘔或渴或腹中痛或

脇下痞鞭或心下悸小便不利或不渴身有微熱
或欬者小柴胡湯主之

血弱氣盡

因天時

腠理開邪氣因入與正氣相搏結

于脇下正邪分爭往來寒熱休作有時默默不欲
飲食臟腑相連其痛必下邪高痛下故使嘔也小
柴胡湯主之服柴胡湯已渴者屬陽明也以法治
之

傷寒四五日身熱惡風頭項強脇下滿手足溫而

渴者小柴胡湯主之

傷寒陽脉濇陰脉弦法當腹中急痛者先與小建中湯不瘥者與小柴胡湯主之

傷寒中風有柴胡証但見一症便是不必悉具凡柴胡證必蒸蒸而振却發熱汗出而解

傷寒十三日不解胸脇滿而嘔日晡所發潮熱已而微利此本柴胡症下之而不得利今反利者知醫以丸藥下之非其治也潮熱者實也先須小柴

胡湯以解外後以柴胡加芒硝湯主之

婦人中風七八日續得寒熱發作有時經水適斷者此爲熱入血室其血必結故使如瘧狀發作有

時小柴胡湯主之

一方小柴胡湯中加生地丹皮秦艽主之

傷寒五六日頭汗出微惡寒手足冷心下滿口不欲食大便硬脉細者此爲陽微結必有表復有裏也脉沉亦在裏也汗出爲陽微假令純陰結不得復有外証悉入在裏此爲半在表半在裏也脉雖

內臺方書 卷之四 五
沉緊不得爲少陰病所以然者陰不得有汗今頭
汗出故知非少陰病可與小柴胡湯設不了了者
得屎而解

陽明病發潮熱大便溏小便自下胸脇滿不去者
與小柴胡湯主之

陽明病脅下硬滿不大便而嘔舌上白胎者可與
小柴胡湯上焦得通津液得下胃氣因和身濺然
汗出而解也

陽明病中風脉弦浮大而短氣腹都滿脇下及心痛久按之氣不通鼻乾不得汗嗜臥一身及面目悉黃小便難有潮熱時時噦耳前後腫刺之小瘥外不解病過十日脉續浮者與小柴胡湯本太陽病不解轉入少陽者脅下鞭滿乾嘔不能食往來寒熱尙未吐下脉沉緊者與小柴胡湯主之厥陰病嘔而發熱者小柴胡湯主之

太陽病十日已去脉浮細而嗜臥者外已解也設

胸滿脇痛者與小柴胡湯主之

疑問

問曰諸方中獨小柴胡湯去滓再煎何也

答曰取其清能入膽之義

大柴胡湯 三十四

治太陽未解便傳入陽明大便不通熱實心煩
或寒熱往來其脉沉實者以此方下之

柴胡 八兩 黃芩 芍藥 各三兩 半夏 大黃 各二兩

枳實四枚 生薑五兩 大棗十二枚

右八味以水一斗二升先煮前七味減四升
加大黃煮取六升去渣溫服

湯議

議曰病在太陽者多汗症病在陽明者多下症若
太陽欲罷未罷欲傳陽明未入陽明雖有發熱身
痛脉來沉實又兼大便不通心腹脹滿或有寒熱
往來又兼脉息沉實若與承氣下之柰何太陽未

內臺方論 卷之四
解若欲麻黃汗之又兼其內熱實是以用大柴胡湯緩下之也柴胡性涼能解表攻裏折熱降火用之爲君黃芩能蕩熱涼心用之爲臣枳實芍藥二者合用而能除堅破積助大黃之功而下內熱而去堅者生薑半夏辛以散之大棗之甘緩中扶土五者其爲其佐獨用大黃爲使其能斬關奪門破堅除熱宣行號令而引衆藥共攻下者也

大柴胡湯症

太陽病過經十餘日及二三下之後四五日柴胡
症仍在者先與小柴胡湯嘔不止心下急鬱微煩
者爲未解也與大柴胡湯下之則愈

傷寒十餘日結熱在裏復往來寒熱者與大柴胡
湯主之

傷寒發熱汗出不解心下痞鞭嘔吐而下利者大
柴胡湯主之

傷寒發熱七八日脉雖浮數者宜大柴胡湯此無

表裏証也

疑問

問曰大柴胡湯中必用大黃古方中又云一方加大黃何也

答曰湯中若無大黃何得言大柴胡湯下之者此乃因前人無剛斷處也

問曰大柴胡湯大小承氣湯調胃承氣湯桃仁承氣湯抵當湯大陷胸湯十棗湯此皆傷寒下泄之

劑各何所用

答曰大柴胡湯治表邪生內實者下之急也小承氣湯治裏邪生內實者下之緩也大承氣湯治裏邪生內實者下之急也調胃承氣湯乃緩其中而下之緩也桃仁承氣湯治小腹急結血証者之急也抵當湯乃破血症之峻者大陷胸湯乃通開破結之峻者十棗湯乃破停飲下水積之駛烈者也柴胡桂枝湯

三十五

內臺方譜卷之四
治傷寒六七日發熱微惡寒支節煩疼微嘔心
下支結外証未去者此方主之

又發汗多亡陽譫語不可下與柴胡桂枝湯和
其榮衛以通津液後自愈

小柴胡和桂枝湯

右如法

湯議

議曰傷寒六七日邪當傳裏微嘔心下支結者爲

裏證見也屬小柴胡湯又兼發熱微嘔惡寒肢節
煩疼外証未去故加桂枝湯和而用之以解表裏
之邪正見者也

柴胡桂薑湯 三十六

治傷寒五六日已發汗而復下之胸脅滿微結
小便不利渴而不嘔但頭汗出往來寒熱心煩
者此爲未解也此方主之

柴胡

黃芩

桂枝

各三兩

枳實

四兩

乾薑

牡蠣

甘艸

各二兩

右七味以水一斗二升煮取六升去渣再煎
取三升溫服初服微煩再服汗出便愈

湯議

議曰傷寒五六日已經汗下表邪當解今更頭汗
往來寒熱心煩者表邪未解也又胸脅滿微結小
便不利渴而不嘔者又兼裏邪也此乃邪在半表
半裏之間故與柴胡爲君以散表攻裏行少陽之

分黃芩之苦爲臣以解傳裏之邪桂枝之辛甘艸
之甘以散緩之頭汗出者爲津液不足陽虛于上
也故與乾薑以固其陽括萋根以生津液而止其
渴牡蠣之鹽以消胸膈之滿其爲佐使以解半表
之邪也若其人左脉小右脉大寒熱膨脹而渴者
用之神應也

柴胡加芒硝湯 三十七

治傷寒十三日不解胸脅滿而嘔日晡所發潮

熱已而微利此本柴胡症下之而不得利今反
利者知醫以丸藥下之非其治也潮熱者實也
先宜小柴胡以解外後以此方主之

小柴胡湯內加芒硝三兩

右如法

湯議

議曰傷寒十三日當解反胸脅滿而嘔者邪氣猶
在表裏之間若用柴胡湯下之則更無潮熱自利

若反以丸藥下之虛其脾胃邪氣乘虛入裏故日
晡所發潮熱已而微利也潮熱雖爲熱實當下柰
有胸脇之邪未盡且先以小柴胡以解外再以本
方中加芒硝而通泄也

疑問

問曰潮熱者實也旣實且熱何不用大柴胡大承
氣湯下之却用芒硝何也

答曰潮熱雖實柰何先丸藥傷動臟腑再用大黃

下之則脾氣傷而復成壞症只得用芒硝以浸潤之而取利也

柴胡加龍骨牡蠣湯 三十八

治傷寒八九日下之胸脇滿煩驚小便不利譫言一身盡重不可轉側者此方主之

柴胡 人參 龍骨 牡蠣 鉛丹

各一兩半

桂枝 茯苓 生薑 大黃 半夏

各一兩半

二兩

半

夏二合

大棗 六枚

右十一味以水八升煮取四升加大黃再煮
取二升去滓溫服

湯議

議曰傷寒八九日邪氣錯雜表裏未分而誤下之
則虛其裏而傷其表胸滿而煩者邪熱客于胸中
驚者心惡熱而神不守也小便不利者裏虛津液
不行也譫語者胃熱也一身盡重不可轉側者陽
氣內榮于裏不行于表也故用柴胡爲君以通表

內臺方譜卷之四
三
裏之邪而除胸脇以人參半夏爲臣輔之加生薑
大棗而通其津液加龍骨牡蠣鉛丹收斂神氣而
鎮驚爲佐加茯苓以利小便而行津液加大黃以
逐胃熱止讞語加桂枝以行陽氣而解身重錯雜
之邪共爲使以此十一味之劑共救傷寒壞逆之
法也

小建中湯 三十九

治傷寒陽脉濇陰脉弦法當腹中急痛者以此

方主之又傷寒二三日心中悸而煩者此方主之

桂枝三兩甘草三兩芍藥六兩生薑二兩大棗十二枚

膠飴十升

右六味以水七升煮取三升去渣內膠飴候溶盡去渣溫服

湯議

議曰建中者建其脾也脾欲緩急食甘以緩之建

中之味甘也陽脉澁陰脉弦者爲中虛內寒也心中是悸者爲氣虛煩者爲血虛故用膠飴爲君甘草大棗爲臣以甘佐甘緩之也白芍藥之酸能收斂脾氣而益其中故用之爲佐桂枝生薑之辛以散餘邪而益其氣也

加減法

建中湯治虛痛者加黃芪治心痛者加元胡索治血虛者加當歸川芎治盜汗多者加小麥茯神治

虛中生熱加北柴胡地骨皮

疑問

問曰建中湯方與桂枝湯同只多膠飴所主治病全不同何也

答曰桂枝湯中桂枝芍藥等分以芍藥佐桂枝而治衛氣也建中湯中芍藥多半而桂枝減半以桂枝佐芍藥而益其榮氣也是以大有不同

對勁於藥而益其藥藥思量以六官不同

前論於藥中處中於藥多半而於林於半以林

谷曰於林於中於林於藥多於於藥於於林而

全不同而也

曰曰於中於式與於林於於同以多與於於於

於

金鏡內臺方議卷之四

金鏡內臺方議卷之五

建安許宏集

古吳程永培校

小承氣湯

十四

治陽明病潮熱大便難脉沉而滑及內實腹痛者此方主之

大黃

四兩

枳實

三枚

厚朴

一兩

右三味以水四升煮取二升加大黃又取升

半去渣分溫服當更衣不爾者盡飲之若更衣勿服

湯議

議曰陽明者三陽之盛也太陽爲陽之表少陽爲表裡之中陽明爲陽之裡是以証屬陽明者皆爲可下也若大滿大實者屬大承氣湯今此大熱大便秘未至于大實只屬小承氣湯也以大黃爲君而蕩除邪熱以枳實爲臣而破堅實以厚朴爲佐

使而調中除結燥也

小承氣湯證

太陽病若吐若下若發汗微煩小便數大便鞭者與小承氣湯和之則愈

厥陰病下利譫語者有燥屎也小承氣湯主之

陽明病譫言發潮熱脉滑而病者小承氣湯主之因與承氣湯一升主之腹中轉失氣者更服一升若不轉失氣者勿更與之明日不便脉更微濇者

裡虛也為難治不可更與承氣湯也

陽明病其人多汗以津液外出胃中燥大便必鞭
鞭則譫言小承氣湯主之若一服譫言止更莫服

大承氣湯四十

治陽明病大實大滿大便不通腹痛大熱其脉

沉實者此方主之

大黃四兩枳實五枚厚朴八兩芒硝三兩

右四味以水一斗先煮二味取七升加大黃

又取五升去渣內芒硝候通口時服取利爲效

湯議

議曰中滿者泄之于內此方乃通泄之劑也傷寒之邪自表傳裡若至陽明則爲內實之盛也如譫言有燥屎大熱便閉腹滿不得通煩熱脉沉實陽明汗多少陰口燥厥陰囊縮此非大下泄之劑不能已也輕者小承氣湯重者用大承氣湯也小承

氣湯少厚朴而無芒硝以芒硝性寒而能潤堅厚
朴能破大實病未至盛以此減之大承氣湯多厚
朴而加芒硝以其病之盛而大滿大實非此不能
除也經曰熱淫所勝治其鹹寒芒硝是也燥淫所
勝以苦下之大黃枳實是也燥淫于內治以苦溫
厚朴是也

大承氣湯證

陽明病發熱汗多者急下之宜大承氣湯

病人小便不利大便乍難乍易時有微熱喘渴不能卧者有燥屎也宜大承氣湯

腹滿不減減不足言當下之宜大承氣湯

陽明少陽合病必自下利其脉不負者爲順也負者逆也互相尅賊名爲負也若脉滑而數者有宿食也宜下之當大承氣湯

少陰病二三日口燥咽乾者急下之宜大承氣湯
少陰病自利清水色純青心下必痛口乾燥者急

下之宜大承氣湯

少陰病六七日腹脹滿而實不大便者急下之宜
大承氣湯主之

下利三部脉皆平按之心下鞭者急下之宜大承
氣湯主之

下利脉遲而實者內實也當下之宜大承氣湯主
之寸口脉浮而大按之反瀦尺中微而澁故知有
宿食也當下之宜大承氣湯

下利不欲飲食者以有宿食也當下之宜大承氣湯
下利瘥其年月日時復發者以病不盡故也當下
之宜大承氣湯

下利脉反滑當有所去下之乃愈宜大承氣湯

下利脉雙弦而遲者必心下鞭脉大而緊者陽中
有陰也可下之宜大承氣湯

病人腹中滿痛按之而實者爲實也宜大承氣湯
大下後六七日不大便煩不解腹滿痛者此有燥

屎也宜大承氣湯

傷寒六七日目中不了了睛不和無表裡症大便秘難身微熱者爲實也急下之宜大承氣湯

陽明病下之心中懊憹而煩胃中有燥屎者可攻腹微滿初頭鞭後必澹不可攻之若有燥屎者宜大承氣湯主之

病人煩熱汗出則解又如瘧狀日晡所發潮熱者屬陽明也脈實者宜下之脈浮虛者宜汗之下之

宜大承氣湯

陽明病脉遲雖汗出不惡寒者其身必重短氣腹滿而喘有潮熱者此外欲解可攻裡也若手足濇然汗出者此大便已鞭也宜大承氣湯主之

陽明病潮熱大便微鞭者可與大承氣湯不鞭者不可與之

若不大便六七日恐有燥屎欲知之法少與小承氣湯湯入腹中轉矢氣者此有燥屎乃可攻之若

不轉失氣者此但初頭鞭後必澹不可攻之攻之
必脹滿不能食也欲飲水者與水則噦其後發熱
者必大便鞭而少也以小承氣湯和之不轉失氣
者慎不可攻也

傷寒若吐若下後不解不大便五六日上至十餘
日日晡所發潮熱不惡寒獨語如見鬼狀若劇者
發則不識人循衣摸床惕而不安微喘直視脉弦
者生脉濇者死微者但發熱譫言者大承氣湯主

之若一服利止後服

陽明病譫言有潮熱反不能食者胃中必有燥屎五六枚也若能食者但鞭爾宜大承氣湯

汗出譫言者以有燥屎在胃中此爲風也須下之過經乃可下之若早語言必亂若當下之者宜大承氣湯

二陽併病太陽症罷但發潮熱手足皸皸汗出大便難而譫言者下之則愈宜大承氣湯

議曰仲景所用大承氣者二十五症雖曰各異然
卽下泄之法也其法雖多不出大滿大熱大實其
脉浮實滑者之所當用也

調胃承氣湯

四十

治汗後惡熱譫言心煩中滿脉浮者主之

大黃

三兩

酒浸甘草

炙二兩

芒硝

二兩

右三味以水五升煮取三升去渣內芒硝温

服

湯議

議曰汗吐下後病不解心煩譫言及心煩不得寐者此非大實大滿之症乃虛結不散而凝于中故屬此方也以大黃爲君而通中結以芒硝爲臣而潤其燥以甘草爲佐爲使緩調其中而輔二藥經曰熱淫于內治以鹽寒佐以甘苦是也

疑問

問曰諸下泄方中皆不用甘草獨此方中復用甘

草何也

答曰諸下泄方乃下大實大熱之證速如星火甘草能緩諸藥是以去也獨此方中乃調和胃氣故用甘草以緩其中也又桃仁承氣湯中用甘草者乃治小腹急結以甘草緩之也

桃仁承氣湯

四十
三

治太陽病不解熱結膀胱其人如狂血自下者愈其外不解者尚未可攻當先解外外解已

但小腹急結者乃可攻之宜此方主之

桃仁

五十個

桂枝

芒硝

各一兩

大黃

四兩

甘草

二兩

炙

右五味以水七升煮取五升去渣內芒硝取四升去渣溫服日三服取微下

湯議

議曰太陽者膀胱也本經邪熱不解隨經入腑結于膀胱熱不得散故作蓄血之症其人如狂經曰

內臺方論 卷之五
血在上喜忘血在下如狂是也若其外症不解或
脉帶浮或惡寒或身痛等症尚未可攻且與葛根
湯以解其外外已解但小腹急結者乃可攻之以
桃仁爲君能破血結而緩其急以桂枝爲臣辛熱
之氣而溫散下焦蓄血以調胃承氣湯中品味爲
佐爲使以緩其下者也此方乃調胃承氣湯中加
桃仁桂枝二味以散其結血也

小陷胸湯

四十
四

治小結胸病症在心下按之則痛脉浮滑者主
之又治心下結痛氣喘悶者

黃連

一兩

半夏

二兩

大括蕞實

一枚

右三味以水九升先煮括蕞取六升去渣內
二味又取二升去滓分三服

湯議

議曰心下鞭不按而痛手不可近者大結胸也心
下滿按之則痛者邪熱淺結爲小結胸也此不可

下只宜散也故用括蕪為君其味苦性寒能破胸
膈結氣半夏為佐為使以辛能散氣也黃連為臣
苦以泄之以輔君主之藥而下心下之結也

大陷胸湯

四十
五

治大結胸症脈沉而緊心下痛按之石鞮者

大黃

六兩

芒硝

三兩

甘遂

一字
為末

右三味以水五升煮大黃取三升內芒硝候

烺盡去滓內甘遂末溫服一升取下利

湯議

議曰病發于陽而反下之熱入因作結胸病發于陰而反下之因作痞所以成結胸者以下之太早故也且脉沉者爲病在裡緊爲裡實心下結者邪氣上結也此爲大結胸之症若非大下泄之其病不去也故用大黃爲君而蕩滌邪結苦以散之芒硝爲臣以軟其鞭鹽以軟之甘遂爲佐爲使以通其水而下其邪之峻烈者也

大陷胸湯症

傷寒六七日結胸熱實脈沉而緊心下痛按之石
鞭者大陷胸湯主之

傷寒十餘日熱結在裡復往來寒熱者與大柴胡
湯但結胸無大熱者此爲水結在胸脅也但頭汗
出者大陷胸湯主之

太陽病重發汗而復下之不大便五六日舌上燥
而渴日晡時小有潮熱從心下至小腹鞭滿而痛

不可近者大陷胸湯主之

太陽病脈浮而動數浮則爲風數則爲熱動則爲痛頭痛發熱微盜汗出而反惡寒者表未解也醫反下之動數變遲膈內拒痛胃中空虛客氣動膈短氣煩躁心中懊懜陽氣內陷心下因鞭則爲結胸大陷胸湯主之若不結胸但頭汗出餘無汗齋頸而還小便不利身必發黃也

傷寒五六日嘔而發熱者柴胡湯症具而以他藥

內臺方書 卷之三
下之柴胡証仍在者復與柴胡湯此雖已下之不
爲逆必蒸蒸而振却發熱汗出而解若心下滿而
鞭痛者此爲結胸也大陷胸湯主之

大陷胸湯戒

結胸症其脉浮大者不可下下之則死

結胸症具煩躁者死

臟結亦如結胸飲食如故時時下利寸脉浮關脉
細沉緊名曰臟結舌上胎滑者難治

臟結無陽症不往來寒熱其人反靜舌上胎滑者不可攻之

疑問

問曰結胸中症有五曰大小寒熱水何以分之
答曰大結胸者乃汗下後而成重亡津液邪氣內結從心下至少腹鞭滿而痛手不可近者此不按而痛乃邪氣內甚也此屬大陷胸以利邪氣也
小結胸者在心下按之則痛是也屬小陷胸湯

寒實結胸者胸中痞結水漿不下此寒邪結于胸
膈也屬枳實理中丸與三物白等

熱實結胸者此不因下後而成乃傷寒六七日邪
氣傳裡之熱實也脈沉緊心下痛按之石韌者只
屬大陷胸湯下邪熱也

水結胸者結胸無大熱但頭微汗出此爲水飲也
亦屬大陷胸湯利下也

抵當湯

四十
六

治太陽病熱在下焦小腹鞭滿下血乃愈所以然者以太陽隨經瘀熱在裡故也此方主之

水蛭三十個 蠱虫三十個 桃仁二十個 大黃三兩

右四味爲末以水五升煮取三升去渣溫服

湯議

議曰太陽病者膀胱之經也若太陽之病不解至六七日熱氣內甚結于膀胱必爲血證也若脉微而沉反不結胸者其人小便自利小腹鞭滿者此

內經入論 卷之五
爲內蓄血症也更其人發狂以熱在下焦必下血
乃能愈也所以然者以太陽隨經瘀熱在裡故也
經曰血在上則忘血在下則狂故與水蛭爲君能
破結血蠱虫爲臣輔之此鹽能勝血也以桃仁之
甘辛破血散熱爲佐以大黃之苦爲使而下結熱
也且此四味之劑乃破血之烈駛者也

抵當湯証

太陽病六七日表証仍在脉微而沉反不結胸其

人狂發者以熱在下焦小腹當鞭滿若小便自利者下血乃愈所以然者以太陽隨經瘀熱在裡故也抵當湯主之

太陽病身黃脉沉結小腹鞭小便不利者爲無血也小便自利其人如狂者血証諦也抵當湯主之傷寒有熱小腹滿應小便不利今反利者爲有血也當下之不可餘藥宜抵當湯

陽明症其人喜忘者必有畜血所以然者本有久

內經方論 卷之五
五
瘀血故令喜忘屎雖鞭大便反易其色必黑者宜
抵當湯下之

病人無表裡症發熱六七日脉雖浮數可下之假
令已下脉數不解胃熱則消穀易飢不大便者有
瘀血也宜抵當湯主之

十棗湯

四十
七

治太陽中風下利嘔逆表解者乃可攻之其人
熱熱汗出發作有時頭痛心下痞鞭滿引脇下

痛乾嘔短氣汗出不惡寒者此表解裡未和也

此方主之

芫花

大戟

甘遂

等分

大棗

十枚

右三味別爲細末以水二升先煮棗熟去滓
內末藥一匕服之羸人減半空心服之當利
下水病不除再服糜粥自養

湯議

議曰下利嘔逆者裡受邪也若其人熱熱汗出發

作有時者又不惡寒此表邪已解但裡未和若心
下痞鞭滿引脅下痛乾嘔短氣者非爲結胸乃伏
飲所結于裡也若無表症亦必烈駛之劑泄之乃
已故用芫花爲君破飲逐水以甘遂大戟爲臣佐
之以大棗以益脾而勝水爲使經曰以辛散之者
芫花之辛散其伏飲苦以泄之者以甘遂大戟之
苦以泄其水甘以緩之者以大棗之甘益脾而緩
其中也

疑問

問曰伏飲之症出于雜病此傷寒法中亦有此証何耶

答曰其人本有痰病因傷寒所發或飲水湯停結不散故成伏飲之症也

議諸下藥

議曰經云陰盛陽虛汗出則愈下之則死

陰盛者惡寒頭

體痛脈浮此表症也陽虛者無裡症也若此表實用麻黃汗之則愈下之即死也

陽盛陰

虛下之則愈汗之則死

陽盛者脉沉實內熱口渴大滿大實此裡症也陰虛

者無表証也若此用硝黃下之則愈汗之則必死也

又曰桂枝下咽陽盛則

斃

當下誤承氣入胃陰盛則亡

當汗誤

以此推之

是知傷寒之法至嚴至警死生吉凶之應者在乎

汗下也以大黃芒硝下之者為大承氣湯小承氣

湯桃仁承氣調胃承氣大柴胡若此數者乃下其

大滿大實大熱者也至若十棗湯大陷胸湯二者

乃下其大邪所結水氣伏飲也於戲汗下之法霄

壤之分不可不慎懼焉若以脉浮在表外症未解
諸條動氣亡血諸虛氣腫似水陰厥似陽皆不可
下也若欲下之者又必須脉沉實其証在裡者下
之無不愈也若乃當下之症又不可遲疑無決直
待其變而後下之緩不及其事也若失下則血凝
氣滯如熱厥失汗則熱閉狂妄而畜膿是也

金鏡內臺方議卷之五